

Pa evita devaluacion di nos florin

Partido RED ta invita pa un discusion nacional riba dolar como moneda nacional

GOBIERNO a entrega su prome presupuesto cu un deficit di 300 miyon y atrobe ta ripara cu no tin disciplina presupuestario.

E deficit financiero a yega proporcionnan insostenibel y pa proximo aña, ta premira un buraco mas grandi ainda di 500 miyon. E formula di e Gobierno actual di hisa gasto y baha entrada ta pone Aruba rumbo di un situacion manera Grecia, según Rudy Lampe, lider di RED.

Gobierno anterior no a haci mihor. E Gobierno di signatura di MEP t'e gobierno cu mas entrada a haya den historia di Aruba y tog no a logra un pre-

supuesto balanza, pasobra su gasto a aumenta drasticamente. For di 1986 a hiba un maneho financiero irresponsabel mirando e debe nacional impagabel cu nos tin y ta dos partido ta responsabel p'esaki, MEP y AVP. Gobiernonan di Aruba lamentablemente a demostra di no ta capaz di sostene nos florin pa falta di disciplina presupuestario, Rudy Lampe a sigui comenta.

Gobiernonan a manca e fondonan di pensioen y awor mes- ter bay fia pa cubri esaki. Bo debe nacional ta bira mas halto, e interes cu bo tin cu paga pa aña ta bira un peso mas grandi riba bo presupuesto cu e conse-

cuencia cu no tin placa mas pa enseñanza.

Pa 2010 a presupuesta solamente 500 mil florin di inversion den enseñanza, un berguenza nacional.

Ta yega un momento cu bo no ta haya fianza mas, pasobra ta surgi duda si bo por cumpli y ta yega un momento cu bo no por cumpli mas manera Grecia.

E peligro di devaluacion di nos florin ta den porta. E presion riba nos florin n'e momento aki ya ta hopi grandi. Devaluacion kier men empobrecimento generaliza.

Mirando e irresponsabilidad di nos gobernantenan durante 25 aña, ta mihor p'e bienestar

general si Aruba bay over riba dolar como moneda nacional, un paso cu ta obliga nos gobernantenan pa bin cu disciplina presupuestario.

Mirando tambe cu e islanan BES y probablemente Corsow y St. Maarten ta bay over na dolar, Aruba no por keda aisla.

Según Rudy Lampe, nos Banco Central ta bay keda cu diferente otro funcion despues di elimina e florin. RED ta pidi un discusion nacional pa Aruba bay over riba dolar pareu cu e otro 5 islanan.

Pa medio di esaki, RED ta invita un y tur, cu ta interesa den pensa hunto cu nan riba e topico aki y otro issue di importancia

p'e futuro di RED.

Dia 30 di mei proximo RED ta cumpli 7 aña di existencia y nan lo recorda esaki organizando un 'workshop' cu tin como titulo "RED: quo vadis?"

E workshop aki lo tuma lugar na ATIA Building na Dakota, banda di oficina di SAC y den mesun caya cu e oficina di Cruz Cora. Dia 30 di mei ta cay riba un diadomingo y e encuentro ta cuminsa for di 1'or te cu 5'or di atardi. Entrada ta gratis y ta habri pa tur publico.

AWEMainta
el corazon di Aruba
 Nos e-mail:
noticia@awemainta.com
Tel: 583-1400
Fax: 583-1444